

Flomerschummer Gebabbel



L

iewe Leser,

s' hääbt jo: Beim 3. Mool wärds Dradizion.

Bei unserm Heftel "Flomerschummer Gebabbel" wers also jetzt soweit. Der Arweitsgreis vunn de AGF hott sich widder viel Mieh gemacht unn die Beidrääg fer die neischt Ausgab zum greeschde Dääl selwer gschriwwe. Leider sinn aus de Bevölkerung kaum Zuschrifde kumme. Isch kanns jo kaum glaawe, dasses in Flomerschumm so wennich Dichder unn Denker gewwe soll !!!

Sogar beim Preisrädsel hänn sich bloos 14 Flomerschummer beteilischt. Vunn de Auswärdische, die jo nur zufällisch an des Heftel kumme sinn, warens immerhie 12. Die Gewinner sinn in de AGF-Sitzung am 11. Juli 96 vunn re nedde junge Daam effendlich gezoge worre, unn zwar:

1. Preis : Thomas Pöllath - Flomerschumm
2. Preis: Andreas Legler - Frankedaal
3. Preis: Josef Blum - aach vunn Frankedaal. - Meer gradulieren!!!

Unn jetzt bitt' isch nochmools alle Leser um ehr Mitarweit fers negschde Heft. Des kann jo allemögliche Beidrääg soi: Gschischdelcher aus unserm Ort, Sache die ähm gfallen odder ah nit gfallen, Urlaubserlebnisse, Bolidisches, Kochrezepte, Rädsel unnsoweider unnsosford. Die Werke bidde abgewwe bei 's Ruppe in de Fränsemer Schdrooß 107.

Die Arweitsgemeinschaft Flomerschumm (AGF) fräät sich druff.

Jetzt soll isch mich noch ganz gewaldisch bei de Firma Dreher bedanke, die uns bis jetzt schunn alle Ausgabe koschdenlos gedruggt, ferdisch geheft unn sogar noch zugfahre hot - unn dann soll isch Eich noch dra erinnere, daß am 8. Dezember widder unsern gemietliche Flomerschummer Woihnachtmarkt schdaddfindt - unn jetzt dirfener endlich in dem neie Heft rumblättre.

Viel Vergniesche beim Lese winscht Eich

Walter Rupp

Rädseluffleesung aus Heft Nr. 2

- 1 - UFFGSCHDUMBT / 2 - GLOWE / 3 - HOSSESCHISSER /
4 - QUETSCHKOMMOD / 5 - ANNERSCHT / 6 - BUTZFRAA /
7 - DUSSELDIER / 8 - MESCHUGGE / 9 - KERSCHEBLODSEER /
10 - BUBBES / 11 - FÄRMCHE / 12 - HEIMCHE /
13 - SCHNOOGELOCH / 14 - LEWWERKNEPP /
15 - SCHIGANEBUGGEL / 16 - BUSSIERSCHDENGEL /
17 - FERZBEIDEL / 18 - BAGAASCH / 19 - SCHOBBEBLECH /
20 - DUBBEGLAS / 21 - FISSEMADEDE / 22 - MOLLEKEPP

Quetschezeit

vunn Klaus Hoffmann




Mei Auge sieht, wohi es bliggt,
viel Obst, vor allem Quetsche.
Friejer war des noch e Gligg,
mer kunnt ´ sich dra ergetze.
So en große Erntesege
iss heit nur noch Ballascht;
de meischde kummt er ungelege,
er macht halt Ärwet unn viel Lascht.
Erntezeit, ihr liebe Leit,
iss jo die schwerschde Johreszeit,
besunners wann in große Menge
die Bääm voll schöne Quetsche hänge.

Die Quetschezeit, die Erntezeit
werd langsam zum Problem;
wer issen heitzudags bereit
unn krawwelt uff die Bääm?
Denn Quetschebreche braucht viel Zeit,
do gebbt ´s noch kää Maschine;
wer Quetsche brecht hot wenich Freed,
der kann nit viel verdiene.
E Quetsch iss doch e sießi Frucht
unn vielseitisch zu verwerte.
Wer vunn denne viel versucht
hot wennicher Beschwerde:
Do gebbt ´s kää Schdockung mer im Bauch,
do legt sich nix mer quer;
wer zuviel isst - des gebbt ´s halt auch -
kriegt manchmal nit die Kehr.
Quetschelatwersch, Quetschemus,
wer wäsen des noch heit,
uffs Brot geschmiert war was Besondres;
stimmt ´s nit, ihr alte Leit?
Doch es Beschte, was fer e Gedicht,
e echtes Pälzer Leibgericht,
sinn Grumbersupp unn Quetschekuche,
ihr kennt mer ´s glaawe - uhgeloche!

"Herr Dokder, der Simulant vunn Zimmer 6 is heit Nacht gschdorwe!!!"

"Na - jetzt iwwerdreibt er awwer:"

KERWE- SAMSDAAG IN FLOMERSCHUMM



Do muß was los soi, sagen die Leit, die durch Flomerschumm fahren. Iwweraal hängen die Fahne haus unn die Heiser sinn mit Blumme unn Fähncher gschmickt. - Richtisch: Flomerschumm feiert jo 4 Daag Kerwe. S'is mittlerweile 3 Uhr, im Immegärteweg herrscht en Verkehr unn e Gewussel, die Umzugswägge, die Schbielmanszieg un's Fußvolk schdrömen zum Uffschdellungsblatz. Beim Ebrechte Dieter schdeht die Zwiwwelböck-Schdandard am Hofdoor unn laad zu'rem Umdrunk oi. Die Miß Schdrohhut gsellt sich dezu unn schdärkt sich bei Kaffee unn Quetschekuche. De Polliche Anton jagt mit Änehalb-Meder-Schritt unn fliegende Hoor die Schdroß nunner, um erschde Aweisung zu gewwe. De Ruppe Walter, Schatzmääscher vunn de AGF, bezahlt mit enre Dasch voll AGF-Geld die 3 Musikzieg unn die Kutsch. S'is 3 Uhr 15, in're verdel Schdunn kanns losgehe. Die Lutze Ursel vunn de Presse is eifrisch am Schreiwu unn Gugge. De Müllers Rolf unn de Anton schdimmen nochmol ab, ob se all do sinn : Zwää fehlen noch; awwer s'werd beschlosse, dasses pinktlich losgeht. Bletzlich kummen die vunn de Kerweworbereitung schunn leicht gschdressde TUS'ler Hilde unn Immo Latsch uffgeregt agerent: **"Die groß Ortsfahn, die ubedingt vorm Umzug hergetraage werre muß, is nit doo !!"** S'is jetzt 3 Uhr 20. Wu iss bloß die Fahn??? Die liggt beschdimmt noch im AGF-Keller in de Ordsverwaltung. Was mache mer jetzt? Im Anton schdehen vor Uffregung die Schwääßperle uff de Schdem.

Ledschdi Reddung: De Ruppe Walter muß her, der hot de Schlüssel zum AGF-Keller. Jetzt is es schunn 3 Uhr 22. De Walter, wie immer "ein Mann von Taten", schwingt sich sofort uff soi Minirädel unn flitzt ab in Richtung Ortsverwaltung. Schnell in de Keller - die Schlüssel glemmen wie immer - die Fahn unner de Arm gepetzt unn ab uffs Rad. Die ganz Fränsemer Schdroß entlang schdehn hunderde vunn Zuschauer, an denne er vorbeifahre muß mit dere große Fahn uff'm Buggel. All guggen'se indressiert, was jetzt bassiert. "Mool doo, de Ridder Kuniberd" - "Kummt desjohr de Umzug vunn de anner Richtung" - "Jetzt awwer dalli" - unn ähnliche Schbrich muß er sich a'heere. Er griggt ähn Schwääßausbruch nom anner, schdrambeld awwer tapfer weider. Ach Gott, was is des Flomerschumm so lang. Is des e Uffschnaufe, als de Walter 3 Uhr 29 des gsuchte Objekt an de Fahnedräger aushändischt. Pinktlich 3 Uhr 30 geht's los in Richtung Kerweblatz. Alle Uffregunge sinn vergesse. Wie gut, daß mer noch e paar Leit hänn, die immer doo sinn, wammer'se braucht unn ah noch in glare Kopp behalden.

Rolf Müller, vumm AGF-Arweitskreis "Lindwurm"



KERWE

Eröffnung durch de Ortsvorschdeher Dietmar Borth:

..... nun iwergebb isch schunn des Wort an de Rainer Hannemann aus unserm Ort, der ab jetzt und nächste Jahre, als Kerweborsch werd uns was sage. Hört hie und seid e bissel schdill, was der Eich jetzt verzehle will. Wenn känner was degege hott, dann schdimmt jetzt oi mim Dietmar Borth: "Mir wählen jetzt de Hannemann zum Kerweborsch, weil der dess kann! Hebt Eier Hand unn schdimmt mit oi - de Hannemann, der muß es soi!!!"

Kerweredd vumm AGF-Vorsitzende Rainer Hannemann:

Allen wohl unn keinem weh - das ist das Motto der AG. Doch, so hammer festgeschdellt, die AG net jeder kennt. Drum nütz ich die Gelegenheit, zu kurzen Selbstdarschdellung heit:

Gesangverein unn SPD, de Sportverein kann mer dort seh', Geflügel- unn aach Vogelzüchter, Kinnergartenante unn Hobby-Dichter, Landfraue unn Kernerbank - auch allen Andersm gilt mein Dank: Zwiwwelböck unn Gartenfreunde, die Kirche- unn aach Grundschulleute, auch Grüne unn die CDU, gewen Ihren Senf dazu. Feierwehr unn die FWG kann mer aach als bei uns seh', AWO, kath. Fraue unn de VDK, sinn ah immer bei uns da. Laienspielkreis, Bauernverein unn zum Schluß de Dietmar Borth is als Vertreter der Ortsverwaltung mit an Bord.

Unn jetzt will ich mol korz erkläre, was ohne die AG nicht wäre:

Denn was bei uns so werd gemacht, is Alles nur fer's Ort gedacht!

De Kerweumzug widder schee, werd organisiert vunn de AG; unn die, die Musik machen uff de Gass, wern bezahlt aus unserm Kass, denn die Stadt, mer wissens alle, muß de Gürtel enger schnalle. Pavillon un Baumpaten-Allee, sinn Aktionen der AG. Des Wappetor, hier hinnerm Zelt, de Zwiwwelbrunne, der gefällt, Spielhaus unn Schaukel uffm Kinnerenspielplatz, waren auch net fer die Katz, denn die, die dort die Fieß hochschwinge, soll'n später uns die Rente bringe. Stabausumzug,

Martinsumzug unn Wohnachtsmarkt, wern vunn die AG gemacht. Unser Kochbuch war en Renner, das Glücksrad drauß läuft immer schneller und das Kerwe-Fußballturnier hawwen viel geseh' - alles "**Made by der AG**". Hier arbeit man noch Hand in Hand, mit viel Herz unn viel Verstand, fer die Allgemeinheit, also aach fer Sie, duhn mir uns immer mehr noiknie. Opfern Freizeit unn aach Flocke, duhn stundelang in de Turnhall hogge, uff harte Stühl, bei kaltem Bier, fast immer dreißig Leit sind wir. Des is en Streß, des sag ich Eich, wir reden uns die Köpfe heiß unn von der Stirn, do rinnt de Schweiß. Doch hinneher sagen fast Alle - heit sinn Entscheidung gefalle - nit fer uns, sondern fer de Ort, unn darum hocken mir als dort.

Wenn's politisch aach so wär, hätten die des Lebe halb so schwer, z.B. beim Krach mit de Umgehungsstroß, gingen die Ortsvorsteher uffnanner los. So ein Streit, noch unner zwei Genosse, nennt man politische Dum-Dum-Geschosse. Unn noch was, des dut mich bedrücke, ich mähne, Flomerschumm unn Eppstää sollten näher zusammerücke, dann müste manchmal auch die Stadt die Segel streiche, denn gemeinsam kann man mehr erreiche. Nur weil sich e paar nit rieche könne, muß mer doch nit die Dörfer trenne. Hier unn dort gibts gute Leit, drum begrüß ich besonders die Eppstäaner heit.

An dieser Stell mach ich jetzt Schluß, weil noch mancher redde muß. Ich hoff, die Kerwe werd widder schee, das wünscht Euch Allen die AG.



"Klääne Weisheide"

Bolidische Musikalidäde: " Wer vunn Tuute unn Bloose kää Ahnung hodd, der kann bei uns immer noch die erschd Geig schbiele!"

Wer immer in die Fußschbure vunn Annre dabbt, kann niemols jemand iwwerhole!

Glick muß de Mensch hawwe: Seid geschdern ufallversichert, unn heit schunn vumm Gerischd gfallt!

Des Schääne am Combjuder is, daß mer sich midd viel greeserer Genauischkeit dodaal erre kann.

De Krug geht so lang zum Mund, bis mer bricht.

S'Älderwerre is die änzisch Aldernadiv zu 'me frijeje Tood.

Pälzer Mengelehre: So Sexe, wie mehr Fünfe gibt's kää Viere, mehr Drei sinn die Zwää Änzische!

Was die Flomerschummer in ehre Urlaubsposchd so alles schreiwen:

SERIE

R + L. an A.W.

Zwää Pälzer schdolwern durch die Alwe,
fuddern Haxe - trinken Halwe.

Owens duhn eehr Huuf dann weh -
jetzt rooden mool, wer sinn die Zwää ???

Erinrunge vunn're fascht Fuffzischjährische:

Wann isch so an moi Kinnerjohre zurick denk, muß isch saage, es hott sich bei uns gans schää viel verännert. Flomerschumm war emol e gans schäänes Baurederfel. Jeder hot jeden gekennt, mer kann saage, mer waren ä rischdischi große Familie. Bei de Baure hott mer die Grumbeere unn die Zwiwwle kaaft; Gemies iss fascht in jedem Gaade ageblantz worre. Alles, was sunscht noch gebraucht worre iss, hot's in de verschiedene Gschäfte zu kaafe gewwe. Schdellt Eisch vor, vier Bäggäreie waren do: De Reinhardts Brezel, de Schowalders Lui, de Schlampe Auguschd un's Leitmanns. Wann isch fortgschickt worre bin ferr Brod zu hole, hott's beim Häämkuhme immer e Dunnerwedder gewwe; beim Brod hänn dann meischdens die Knerzelcher gfeht - die hänn äfach glasse gschmeckt. Worscht unn Flääsch iss beim Hauge Schnagges unn beim Kochenderfer Jule oigekaaft worre. Milch hott mer entwedder bei de Baure frisch vunn de Kuh griggt odder beim Hahne Kurt. Sogar e Milchzentral hänn mer katt. Bei de Maule-Gems hott's nix gewwe, wasses nit gewwe hott. Wammer dort e Käschdel Wanze verlangt hott - de Oddel hott genau gewißt was gemänt war.

En Duwagglade war doo, zwää Fahrradgschäfte (beim ääne waren noch Haushaltware unn Gscherr debei), die Saddlerei Lauth, de Schmid Wolf, de Braunward unn Gebhard, zwää Drogeriee, zwää Schuhmacher, die Schuh-Else, es Elektroschäft vumm Neie Schoh, de Kohle Mayer, drei Molergschäfte unn die Ännerungsschneiderei Weege. Zwää Friseerläade hänn fer flodde Kepp gsorgt unn mit frischem Eel iss die Fraa Hild durch die Schdroße gfare. Ferr de große Dorschd vunn de Leid waren genug Wertschafde do: Pälzer Hof, Lind, Paul, Germania, Bahnhofswerschaft unn de Turn- unn Schbordveroin. Wie's do drinn als war, kann isch ganet saage, isch hab do net noigedirft, isch war noch zu klää. Ärztlich versorgt hott uns de Dr. Schmidbauer, nooch de Zäh hott de Dr. Rubbert geguckt, unn uff ehre alde Fahrrädel iss unser "Iewi" Schwesder Klara durchs Dorf gfare unn hott ern Dienscht gemacht. De Parre Walder war ferr die evangelische unn de geistliche Rat, Pfarrer Jaggob Willebacher, war ferr die kadollische Schääfcher zuschdennisch. De Grimme Ernschd hott die Zähler abgeleese, dann hott mer genau gewißt, was an Schdroom, Gas unn Wasser verbraucht worre is. Ferr die Bekanntmachung in unserm Derfel war de Möckels Herrmann mit seim Fahrrad un de Schell unnerwegs.

Ja, so war des - unn jetzt hett isch noch so e paar rädselhafde Werrder; manche gib't's nimmi - awwer iwverleggd emol!!

Keggerer, Bosgo, Goggsen, Plotz, Beddel, Tulle, Noller, Gasching, Turres, Badscher, Bebbe, Fibs, Bäscht, Schbadill, Mannerz, Essisch, Verzisch, Schbegges, Jatzer, Frosch, Uhu, Schadder, Gram, Schdips, Boxer, Bubbes, Noffe, Drobbe, Fogger, Gansert, Gääs, Naas, Sambo, Matzel, Bärsel, Knebbel, Bedde, Erbs, Atzel, Sim, Lett, Gems, Dämmel, Ferschder-Fleck, Lobbes, Gobber, Schneeds, Pie, Eileferschder, Baddisch, Salaad-Käänisch, Rambes, Bauch, Bubbes, Säg, Baschdel, Loh - ach, was wars frieher so schää!!!

Helga Wirth



E schnelles Rezebt:

Im Summer waremer oigelade zum Grille. Dodezu hot's verschiedene Salaade gewwe. Äner hot sich "Laach-Salaad" genennt. De Walder hot gleisat: "Meer nit so viel" - weiler nit gäärn rohe Laach ißt. Awwer glei druff waren nit bloß bei uns die Salaadschisselcher leer, sogar die groß Schissel is hinnenooch noch ausgeschleggt worre.

Un do isses Rezebt fer 4 Persone:

2 Schdange Laach in foine Ring schneide, 1/2 Doos Ananas in ganz klääne Schdiggelcher schnipple, 2 hardgekochde Eier werfle, 1 Abbel raschble, 1/2 Glas Sellerie-Salaad, 4 Eßleffel Miracel Whip unn en Schbriter Tabasco dezudue - dann alles gud vermische unn zum Abschmege noch e bissel frisch gemahlene Peffer droschmeiße.

S'Wischdigschde an dem Salaad iss, daß merrn ään Daag vorher mache muß, weil jo der rohe Laach gut durchziehe soll.

Vielleicht sollt mer sich des schnelle Rezebt fer die neggscht Oiladung odder fer die Neijohrsnacht mol im "Hinerschdibbche" behalde.

Helge Rupp



Annre Länner - gleiche Sidde

Im Friehsummer war en Dääl vunn de AGF-ler zusamme in Urlaub uff Langeland in Dänemark. In dem klänne Ort "Humble" war ferr Sunndaags e Feschdividääd agekindischd. Neigierisch, wie meer halt so sinn, wollt' mer mool gugge, wie die Däne ehr Feschde feiern. - Wie mer hiekumme sinn, hammer in Haufe Leit gsehe, die mit Kind und Keggel, mit Kärb unn Kiehldasche in e großes Gebäude gepilgert sinn. Des is uns schbanisch vorkumme; desweje hammer uns des Blagaat nochmool genauer ageguggt. Do hot ganz unne drunner gschdanne: "**MEDBRINGE MAL**". Moi Fraa hot iwwersetzt: "**MITBRINGEN ESSEN**" - uff deitsch gsaat: "**Jeder bringt soi Fudder selwer mit**". Jetzt hammer awwer gschdaunt - do sieht mer mool, wie weit sich unser schäänes **Flomerschummer Brodbeidelfescht** schunn rumgschbroche hot.

Walter Rupp

Die Elwedritsche-Werkschdadd

Kummschd vunn Lambsem weschdwärts roi,
so fällt der's schunn ins Aag enoi:

E riesegroßi Elwedritsch

bei's Ruppe iwwers Door wegschbitzt.

Dess kabiert de Bleedschd sofort -
doo kummt se här, des is der Ort,
wu jenes Pälzisch Wunnerdier
sein Schdammsitz hot -
un äwe dort,

sich wohlfiehl wie de Haas im Klee.

Geh nor mol noi, do kannschd se seh.

Uff de Brunne, uff de Lambe
hoggt so e Vieh mim digge Wambe.

Uff de Regale, wuhie mer sieht,
do schdehen se, in Reih unn Glied -

Schnawwel an Schnawwel - dischd beinanner,

s'is ääni schänner wie die anner.

Sogar dehääm beim Kanzler Kohl
fiehl sich so e Saudier wohl.


Do hoggt se rumm -
in Oggerschumm;

doch was isch dodebei gern wißt:

Ob die aach so gäärn Saumage frißt?

- Egal wie's is, ehr liewe Leit,
isch mach jetzt äfach Schluß fer heit.

Erwin Gerhard - Frankedaal



SCHAM



OLIDIGG IN FLOMERSCHUMM

ACH
AUMANN
EIL
EST
ÖHM
ORTH
RAUER
RUDER


Walter Rupp




Unn widder du´mer Woi verschenke,
 doch vorher miss´ner pälzisch denke!
 Erschd dabber alles iwwersetze,
 dann dirfener de Woi verpetze !!!

1. Preis : Sex Flasche Pälzer Woi
2. Preis : Immerhie noch viere
3. Preis : Bloß noch zwää


Die Frooge: 1= Sonderwünsche / 2= Ort bei Grünstadt/ 3= Kleinkindtransporter/ 4= Dampfnudelbäcker / 5= Teil eines Stallbesteckes / 6= "Beherzte" Pforte / 7= Sehkraftschwundverhinderungsgemüse / 8 = Beilage zu Frage 12 / 9= Koppel für Federvieh / 10= Gebäck, bis man es braucht, ist das meiste schon weg / 11= vergorene Strauchfrucht / 12= Fetttiefendes Hauptgericht zu Frage 8 / 13 = Geizkragen



Des Leesungsword bidde bis schbedeschdens 6. Dezember bei´s Ruppe in de Fränsemer Schdroß 107 oischmeiße. Die Gewinner werren nämlich am 8. Dezember bei de Eröffnung vumm Woinachtsmarkt gezooge. - Viel Gligg !!



WUNNER
IWWER
WUNNER



De Fritz kummt zum Hannes in die Dorfkneip unnn verzehlt: **"Schdell der mol vor, geschdern owend kummt moin Hund, de Axel, vumm Gaade roi unnn hott im Nochbers Filp soinn große schlabbohrische Haas im Maul. Dood warer - unnn ganz verschmeert mit Dreck unnn Schlamm. Ach Gott, was bin ich verschrogge. Wann der Filp erfahrt, daß moin Axel soinn Liebling doodgebisse hott, gibt des de greeschde Grach. Du wääscht joo, mer sinn sowieso schunn lange Johre gar nit gut uffnanner zu schbreche. In moiner Verzweiflung hab ich halt den doode Haas in die Baadwann gschdeggt, abgschrubbt, midem Handdunch unnn midem Föön abedriggelt unnn bin dann durch de Gaade in die Scheier vum Filp unnn hab den Haas widder in soinn Kaschde noighoggt!"**

Do lacht de Hannes unnn sescht: **"Des war jo mol widder e Määschderschdigg - kumm dodruff gebb ich derr äähner aus!"**

- Korz, noochdeem de Fritz dann häämngange is, schderzt de Filp in die Wertschaft unnn ruft: **"Hannes, gebb merr schnell en Korze. Du kannschd der jo nit vorschdelle, was meer heit bassiert is. - Du hoscht doch ah moin große Haas gekennt. Denn hemmer doch die ganze Johre nit gschlacht, weil er ehm immer so gloor ageguggt hot, mit soinne Kulleraage. Der war halt jetzt soo alt, daß er geschdern gschdorwe is. Unnn weil er merr so lääd gedoo hott, hawwisschen glei im schdröhmende Reje ganz hinne im Gaade oigegraawe. Unnn jetzt - bass uff - jetzt kummts: Heit moje kumm ich in die Scheier unnn do hot mich de Schlaag gedroffe - hoggt doch tatsächlich der doode schdeife Haas gschdrischelt unnn geberrscht widder in soim Haasekaschde!!!"**

Walter Rupp

S´Henrietteche liggt im Bettche - hot sich selwer krank gemacht.
Kummt de Dokder an ihr Bettche - sagt: "Gun Dach moi Henrietteche,
trink e Tass voll Tee - moje werd der´s besser geh" !

M. L. Hartmann



Wie's friehjer war!



Ich mach die Aage zu unn drääm vunn friehjer, wie mer noch klää waren -
vumm Speetjohr, dem triewe - unn vunn de Adventszeit :

De Gaaschde Bebbes, de Ladsche Kurt unn de Seilers Auguscht fahren die
Gellriewe hääm unn de Mohre Ottl unn de Dresslers Ernscht schaffen die
Zuggerriewe uff de Verladeplatz; die werrn dann nooch Worms in die
Zuggerfabrik transbordiert - unn aach die ledschde Grummbeere bringen se
hääm. Beis Diddemers werd die Wutz gschlacht - die dauert ääm grad.

Die Stenner sinn voll mit Kraut, Schbeck unn Bohne. E Kischd voll Mehl, in
Hawwe mit ogelegte Eier un in Schdumbe Woizugger - der is nit so deier. In
Ämer Sirup, uffem Regal steht de Latweg, der vorher schdunnelang im große
Kessel gebrozeld unn geriert worre is. Ach, war des e Ärwet, bis der in de
Gläser war - die ganz Herberg war verschbritzt unn die Ärm warn verbrennt.

Im Schopp hängen e paar Bindel Kreider - wann mol äns krank werd.

Die Grummbeere sinn im Keller unn aach de Brand.

Die Mudder unn unser Mamme fangen ah Woihnachtsgudsel zu bagge, des
foine hawwense verschdeggelt in e schääni Kachel unn in große Abbel dezu.
S' Weschekorb-gudsel is in e Sanellaschachdel kumme, dasses märb worre is.

Was vermiss isch doch die Zeid, grad so korz vor Woihnachte. Was wars do
gemiedlich, liewe Leid. Wanns im Häärd gegnischdert hot unn gebrummt - unns
Schiff uffem Owwe unn die Wasserhex häänn gsummt. Durch die Rizz vunn de
Häärdblatte hot mâr die schännscht Beleischdung ghatt. Die Owweblatt war
zugeleggt mit Grummbeerscheiwe vunn die iwrische Gequelle - aach was waren
die Owwegrischdelscher so gut. Unn fer jeden is noch

en Abbel uff dere hääße Häärdblatt hie- unn hergewaggeld.

Vumm Schliddefahre waren uns Kinner die Fieß naß unn kald - do hot mer
s' Baggowwedeerle uffgemacht unn se noigschdreggt halt.

Unn morgens frie wars bei uns dehääm, isch wääß noch, vorm Owwe so
rischdisch bequem. Do häänn an de Owweschdang die Leib- unn Seelhosse un
die selbschdgschdrigge Schdrimp kangge. Was war des warm, wann mer
noigschlubbt sinn - unn uffm Baggowwedeerle waren die Schuh ogewärmt fer
die Fieß. Ach war's do mollisch warm - in de Kisch bei de Mamme, do war mer
nit arm. Unn wanns dann gesche Owend widder duscher worre is - swar fascht
dunkel - bei rem Schoi vum Häärdgefunkel unn em Kerzel uffem Disch, do hot
de Vadder ebbes verzeht unn die Mudder ebbes gsunge.

Des alles liggt soo weit zurigg, des griggen unser Kinner unn Enkel gar nimmer
mit. Schad drumm, so is halt die Zeit - mer kânns bloß noch verzehle,

mer tuts arg leid!

Christl Müller

IMBRESSUM

Rausgewwer: Arweitsgemeinschaft
Flomerschumm (AGF)

Arweitsgreis

"Flomerschummer Gebabbel":

Udo Böhm, Rainer Hannemann,
Christl Müller, Anton Pollich,
Helge unnn Walter Rupp, Helga Wirth
unnn Reinhold Wirth

Gschdaldung: Walter Rupp

Druck: Fa. Dreher, Frankedaal

Ufflaag: 1500 Schdig

**Die AGF winscht alle Leser e
schääni Woihnachtszeit unnn en
gude Rudsch ins neie Johr.**

Erschiene im November 1996



DREHER-DRUCK

Mikrofilm-Consult GmbH

Hannongstraße 27

67227 Frankenthal

Telefon (0 62 33) 2 72 42 · Fax (0 62 33) 2 75 52